

«Թույլ չենք տա նոր քաղաքանտարկյալ»

30.08.2013 14:16

Օգոստոսի 24-ին ոստիկանների և Արգիշտի Կիվիլոյանի միջև ծագած միջադեպի կապակցությամբ՝ ՊՊԾ գնդի դասակի հրամանատարի զեկուցագրի հիման վրա ՀՀ քրեական օրենսգրքի 316-րդ հոդվածի հատկանիշներով /իշխանության ներկայացուցչի հանդեպ բռնություն գործադրել/ հարուցվել է քրեական գործ:

Երեկ ժամը 17:00-ին քաղաքացիական ակտիվիստ, Armenia Today լրատվական կայքի համակարգող, մասնագիտությամբ իրավաբան Արգիշտի Կիվիլոյանը հարցաքննության էր կանչվել ՀՔԾ:

ՀՀ գլխավոր դատախազության շենքի դիմաց հավաքվել ու նրան սատարելու էին եկել մի խումբ ակտիվիստներ և փաստաբանների պալատի 30 փաստաբաններ՝ պալատի նախագահ Ռուբեն Սահակյանի գլխավորությամբ:

Հիշեցնենք, որ միայն այս ամսվա ընթացքում իր ակտիվ գործունեության արդյունքում Արգիշտի Կիվիլոյանը երկու անգամ բերման է ենթարկվել ոստիկանական բաժանմունք: Առաջին անգամ նրան տարել էին Ոստիկանություն քաղաքապետարանի դիմաց ապօրինի վրան տեղադրելու մեղադրանքով, իսկ 2-րդ անգամ՝ օգոստոսի 24-ին, երբ Կոմիտաս 5ա-ի բնակիչները փորձել էին փակել Կոմիտասի պողոտան:

Արգիշտի Կիվիլոյանի համոզմամբ՝ «Այն ինչ չհաջողվեց իրականացնել օգոստոսի 1-ին, բավական կոպիտ ու անգրագետ ձևով իրականացվեց օգոստոսի 24-ին: Այն ժամանակ էլ, երբ ինձ պարզապես գողացան ու ապօրինաբար տեղափոխեցին Ոստիկանություն, վնասվածքներ ստացողը ես էի, բայց նույն ոստիկանները փորձում էին այնպես անել, որ ես հունից դուրս գամ ու իրենց պատասխանեմ: Բայց ես չենթարկվեցի սադրանքներին: Այդ միջադեպի հետ կապված ես Ոստիկանությունում հաղորդում տվեցի կատարվածի վերաբերյալ, բայց թե ինչ ընթացքի մեջ է գործը, ես տեղեկություն չունեմ», - ասաց նա:

Լրագրողների հետ զրույցում Արգիշտի Կիվիլոյանն ասաց, որ իրեն հարցաքննության են հրավիրել քրեական օրենսգրքի 316 հոդվածի համաձայն: Նշված հոդվածով գործը հարուցվել է ոստիկանի բողոքի հիման վրա: Նա հստակ չգիտի, սակայն ենթադրում է, որ հարցաքննության հրավիրվել է որպես վկա:

«Ես իրականում պետք հրավիրվեի որպես տուժող, բայց գիտենք ինչպես է լինում Հայաստանում, դուք կարող եք հրավիրվել որպես վկա, հինգ րոպե հետո դառնալ կասկածյալ, տասը րոպե հետո՝ մեղադրյալ», - ասաց նա:

Չնայած նրան, որ Ա. Կիվիլոյանը իր փաստաբանների հետ ներկայացել էր հարցաքննության, սակայն այն տեղի չունեցավ:

«Ավելի քան երեսուն փաստաբանով գնացինք, պահանջեցինք, որ ապահովեն պատշաճ աշխատանքային պայմաններ, որ փաստաբաններս լիարժեք կարողանան ապահովել իմ պաշտպանությունը: Թող ՀՔԾ-ն ստեղծի պատշաճ պայմաններ, որ իմ փաստաբանները կարողանան լիարժեք կատարել իմ պաշտպանությունը: Եթե իմ փաստաբաններին ներս չեն թողնում, ինչպես են նրանք կարողանալու պաշտպանել իմ շահերը», - ասաց պարոն Կիվիլոյանը:

Աշխատանքային օրվա վերջում նրան հանձնված ծանուցագրով պարզ դարձավ, որ հարցաքննության օրը փոխվում է և նրան կհարցաքննեն օգոստոսի 30-ին ժամը 12:00-ին:

Հավելենք, որ այս պահի դրությամբ Ա. Կիվիրյանի դեմ հարուցված քրեական գործով նրա շահերը պաշտպանելու ցանկություն են հայտնել մոտ 150 փաստաբան և չի բացառվում, որ նրանց թիվը կավելանա:

Կարինե Ղուկասյան

ՀՀ փաստաբանների պալատ

```
Վերադառնալ $(window).load(function(){ if(typeof $(".fb_comments_count").html() != "undefined" && parseInt($(".fb_comments_count").html()) != 0){ updateCommentsCount(window.location.href); } })
```